

陶

齋

臧

石

記

匄齋藏石記卷二十九

唐十三

武珍夫人裴氏墓誌銘

石高一尺零八分廣一尺一寸一分十七行行十九字至二十二字不等正書

唐故太原府都知兵馬使兼慶州行營使試殿中

監賜紫金魚袋武公夫人裴氏墓誌并序

夫人裴氏河東人也遠祖因宦遷家今為洛州洛陽人矣祖諱寬父諱靖皆代有芳名為時器重夫人即靖公之弟七女笄年捧檟媵于武氏君子諱珎即郢公之嗣子少閑書劍投筆從戎習武侯之陣圖善李將軍之射法時奉道節使委以腹心補充為行營之

將於貞元元年三月十三日亮醜大來援師不至軍仕潰散陷沒
于衛州尋訪無所夫人晝哭號天撫育孤幼志至成立皆輝義方
奈何天鑿不明使我良壽以貞元廿年二月十八日終於洪州南
昌縣之旅□春秋五十有八長子志溫次志誠女十四娘等皆泣
血□喪遠扶靈櫬達于惟揚卽以其年七月一日奉夫人之裳惟
招府君之魂合祔于江陽縣嘉甯鄉五乍村之平原禮也恐陵谷
將變故刻石紀年銘曰

猗猗夫人兮令德深

俄奄忽兮成古今

招府君兮魂魄臨

同合祔兮雙劍沉

誌首標題悉書其夫官職首稱太原府都知兵馬使兼太原

府唐號北都自開元十八年改置河東節度使於此終唐之世未嘗改珍既居是官則誌中所稱本道當即係河東道是時各鎮兵馬使率殺其節度使而自代而田興竟以都知兵馬使遂舉魏博六州地一旦歸朝則知此職固軍中主兵柄者矣誌稱貞元元年三月元醜大來陷沒於衛州攷衛州之陷新舊兩書及通鑑皆不載是時藩鎮惟田緒最為逼近然緒雖暴亂朝廷方羈縻之未嘗稱兵餘如朱滔李希烈李懷光皆先後同反然滔自貝州敗後踉蹌北歸更無暇南擾懷光雖強亦尚未擾及河北惟希烈久踞汴州其黨復分據滑鄭等州皆與衛境相接是時雖已克復然亂兵四竄所在攻

掠亦應有之事然則攻陷衛州者當即希烈之兵諸史竟無一語及之蓋亦疏矣慶州唐屬關內道珍為行營使故留防衛州而遂及於難也百官志殿中省監一人從三品掌天子服御之事魚袋古之算袋後魏以龜唐改用魚高宗給五品以上銀魚袋三品以金景雲中詔衣紫者佩金魚袋衣緋者以銀飾之開元初駙馬都尉從五品者假紫金魚袋都督刺史品卑者假緋魚袋五品以上檢校試判官皆佩魚自是百官賞緋紫必兼魚袋謂之章服而賜予遂濫矣媯即媯之省文說文媯問也史記春申君媯李園女弟魏書昭成帝紀媯慕容元真妹為皇后北齊書李元忠傳詔元忠與尚書令元

羅致娉於晉陽字皆作娉蓋娉與聘音義並同軍仕潰散當
即軍士潰散南昌即洪州治地理志謂武德初置而旋廢至
貞元中復改爲南昌縣此誌作於貞元時則正相合也夫人
祖諱冕當是冕字唐書有裴冕傳亦河東人然彼歷相肅代
兩朝封冀國公今此誌不敘當別是一人耳

魏和墓誌

石高寬各一尺三寸四分二十一行行二十三字字徑四分
正書蓋高七寸五分寬七寸八分三行行三字字徑一寸五分
篆書有幾格

大唐故魏府君墓誌銘

蓋

大唐故河南府汜水縣尉鉅鹿魏公墓誌銘

并序

汜水縣尉清河房寅撰

公諱和字元真邢州郡鉅鹿人也其先晉畢萬之後也衣冠之盛
軒冕之貴並載在史籍今略而不書公即我唐金吾將軍贈太子
太保靖之曾孫京地尹洪府觀察贈太子太師謚曰景公少
遊之孫監察御史大理正讓之子公幼而岐嶷識理天縱才超
賈馬文筆生知時輩欽風遠近慕德弱冠以門蔭之重補弘文館
學生解褐懷州脩武縣尉秋霜繞凝寒松初茂清貞雅操人到于
今而緝之貞元中調補宣州宣城尉縣雄務重繁惣撥推公莅事
精通恬...為理奸豪併息冤滯獲申邦伯舉能論薦褒美固諱不
就□以驟進趁時選校河南府汜水縣尉王畿清紫曩足方申何

面上天不弔文星見落親友哀慟羈孤靡依以元和元年正月五日寢疾不瘳告終于汜水官舍享年五十六即以其年二月十五日歸葬于北茫祔

先塋禮也夫人隴西李氏婦德令儀天資淑質芳菲難久先被風零嗣子端次子竦孳踰泣血屠裂肝心有女七人長適前宣州叅軍趙郡李氏次適前宣州南陵縣尉隴西李氏鳴獻雪際晴峯誰為見賞澄潭片月不復重覩寅龍鐘後時黜事為友撫孤增慟揮涕為銘銘曰

令德文詞芳人所上矜不伐兮海為量孤貞守固兮心不欺秉仁抱義兮衆共推豈意芳時兮松桂衰親丹旒兮涕淚垂

按魏君祖少遊新舊唐書並有傳誌稱少遊官京兆尹洪府

觀察與兩書竝合贈太子太師與新書合舊書作太師謚曰景公則兩書皆無之可據誌補史之闕誌云弱冠以門蔭之重補弘文館學生新書百官志武德四年置修文館于門下省九年改為弘文館貞觀元年詔京官職事五品已上子書書者二十四人餘館習書出禁中書法以授之其後增為三十八人舊書作三十人魏君以門閥得膺是選猶沿貞觀舊制也後漢書靈帝紀光和元年始置鴻都門學生魏志明帝建昭陽殿公卿已下至於學生莫不展力則學生之名亦已古矣誌又云歸葬于北芒即北邙邙與芒通後漢書恭王祉傳葬于洛陽北芒芒與茫通詩商頌洪水芒芒陸機感逝賦

嗟予今之方始何視天之芒芒三字可互通也

劉通妻張夫人墓誌銘

石縱橫各一尺一寸九分共十七行行二十二字至二十五字
不等正書

唐故南陽張夫人墓誌銘并序

夫人張氏其先陳留郡開封縣人也今據時望移家淮楚今遂揚
州江陽縣人矣曾祖岷處性廣儒風規可則門標仁孝名立其德
祖潛風雲稟性忠孝立身能混於世居然自真父洽運務忠幹奉
公克愨才聞八座位恭孔隣夫人即公之第三女也三儀遠著五
德流鄉意能柔順貞明內儀饒始登笄旋歸彭城劉氏自結秦晉
嘉禮婦禮舉按之風入室綢繆豈絕恭姜之禮夫人承大家之餘

訓受母師之典教何啻天奪斯壽魂魄上昇體掩泉門歸于逝水
粵以元和元年八月六日奄終于江陽縣崇儒坊之私第享年卅
有九夫人育子一人曰仕舉夙承雅訓早著令名哀涕泣血哭踊
無聲即以其月廿五日窆于嘉甯鄉五乍村禮也故刻茲貞石永
為記之銘曰

皇天不仁

殲我慈母

浮雲往來

清魂何去

不見慈顏

空悲風樹

灑淚灑血

朝：暮：

元和元年八月廿五日記

右誌與其夫劉通誌合刻通誌見後

昭成寺尼大德三乘墓誌銘

石高廣均一尺一寸九分
二十行行二十字正書

大唐元和元年三月十四日長安昭成寺尼大德三乘行歸窆于
義甯里之私第春秋七十九戒臘一十九伏惟 神兮俗姓姜

氏望奉天水以簪纓承繼家寄兩都自頓 駕長安貫移上國

今則長安高陵人也故中散大夫贈太子左贊善大夫執珪之女

適 昭陵令贈通州刺史李昕之妻婦德自天母儀生稟事君

子之門教姜比德方擇隣之愛教母其明神儀惠和體量凝肅有

二子長曰誼終杭州餘杭縣令幼曰調終温州安固縣尉有嗣孫

五人定寅寓甯寔皆夙承嚴訓克孝克忠或位崇百里之榮或再

班黃綬之職

神方自中年鍾移天之禍晚歲割餘杭之愛由

是頓悟空寂宴息禪林自貞元四年隸名於此寺嗚呼蓮宮始構
法棟斯摧定等哀慕悲踊攀援何及以元和二年二月八日敬奉
靈輿歸窆于城南高陽原禮也白日晝昏悲風慟起玄雲匝壑上
之野苦霧暗行輔之衢芻靈已陳窅戶斯掩泌追承遺則泣而為
銘勒石紀文以永終譽其詞曰

神假溫恭天資淵德無言成教有儀是則捨故里之喧喧歸夜堂
之寂寂朝雲出谷兮行雨散暮鳥悲鳴兮去無跡流光西沒逝水
東極開泉壤兮千秋烈餘薰於貞石

右李昕妻年六十時為尼以夫與子俱即世有悟空寂適而

為此按宋徽求長安志休祥坊萬善尼寺之西有昭成尼寺據注為昭成皇后追福改為此寺通鑑二百四十九胡注僧之能持戒行謂之大德宋白曰唐制諸寺有綱維有大德大德主教授三乘殆能持戒行故有此號義甯坊在唐皇城西第三街之南誌所云行歸寂於義甯里之私第指此中散大夫及左贊善大夫俱為正五品階其父執珪不見於唐書宰相世系表亦無之世系表東祖房有所名不載其官履其下一格有詞有諫與此誌所子誼調同輩行疑即此之李昕百官志諸陵臺令各一人從五品上所為昭陵令以此其贈通州刺史通州唐屬山南道今四川綏定府達縣治是餘名即

隸名隸別體字高陽原在長安縣西南二十里見宋敏求長安志此誌云泌追承遺則泌應是撰人名而失其結銜其銘詞言朝雲出谷兮行雨散微近於藝施之於比邱尼尤不應爾也

李卅三娘墓誌

石高一尺一寸一分
縱寬一尺一寸三分
約十五行行十五字
至十八字不等字徑五分
縱約不等正書蓋高五寸五分
寬六寸四行行二字字徑二寸篆書

唐故隴西李氏女墓誌

維唐元和三年歲次戊子隴西李卅三娘之墓

卅三娘小字汧國時年十七即

景皇帝之後

大鄭王亮

之孫 曾祖孟攀祖翼父高以其年五月十六日遘疾旬日終於
尊賢里之家室傷其一身幼喪慈父孝不展情長未適人奄婦泉
壤嗚乎命至此耶枉之致耶茫、誰測杳、難聞卜日有期婦奉
吳阻以其月十九日塋于伊水之西用祔外兄楊泛之墓若神而
見知幽魂有託生為秦晉沒也豈殊何必虛充冥誓然契詞曰
禮初過笄 年未及嫁 空懷婦德 薜花先者 卜宅伊西
將為長夜 幼女無依 遂隣泉舍 不失其親 存沒姻亞
陵谷慮變 尅石於下

誌稱卅三娘小字沂國景皇帝之後鄭王亮之孫曾祖孟攀
祖翼父高其言鄭王亮之孫者言孟攀為亮之孫也攷新舊

唐書鄭孝王亮高祖從父仕隋為海州刺史武德初追封鄭
王子神通神符孟犖翼高於史無徵神通之裔有李復貞元
十三年滑州刺史卒官神符之裔有李程元和中由劍南西
川節度行軍司馬僊遷至吏部侍郎李石元和十三年進士
擢第最其時代世次略與汧國父高相若汧國之先以無事
實可稱史故略而弗書矣誌云用祔外兄楊泛之墓下用盧
充冥婚事銘詞禮初過笄年未及嫁及遂隣泉舍存沒姻亞
云云未嫁之女祔葬聘夫之塋金石例所未載也

獨孤夫人墓誌銘

石高一尺二寸二分微強廣一尺
二寸六分十五行行二十字正書

唐故隴西獨孤夫人銘 益正書

大唐故河南府戶曹叅軍陳府君夫人河內縣君隴西獨孤氏墓誌銘 并序

前太僕少卿知東都少府少監事陳洵撰

夫人貞懿皇后從父之妹開元初左羽林大將軍諱律之親姪孫祖左衛郎將知巡諱珎祖母博陵崔氏故兵部侍郎敦禮之姪女美容貞能治家亦謂鵲巢麟趾之貴符代蓋時之族興僕

相門親懿三重稠疊更盛迭貴亦謂焯暉哉夫人父諱楚贈工部侍郎性仁孝信智與僕相善如弟如兄共祈余長子故朝散大夫河南府戶曹叅軍諸為夫人之伉儷生一子二女夫人以元和四

年八月十四日寢疾卒于恭安之里第享年六十有六長女与弟
生亦極養歿亦崇喪貼賣求財以充凶事以十月廿四日合祔於
邙山東原禮也嗚呼兼余子貳之戚嗣親之悲聞之者感傷見之
者殞淚悲哉悲哉觀塗車之宿進痛總幕之晨征丹旒飄風縞素
盈野其銘曰

太虛湯湯 有死有生 莫不歎逝 飲恨吞聲 浮休之世
彭殤亦一 千變万化 歸于其室 泉門永開 有人無出

右誌言夫人為貞懿皇后從父之妹按新唐書后妃傳代宗
貞懿皇后獨孤氏失其所人父穎左威衛錄事參軍舊書
后傳以恩澤官其宗屬叔太常少卿卓為少府監后兄良佐

太子中允若夫人之從祖禕及祖珣父楚俱不著宰相世系表亦無之崔敦禮新舊兩書有傳歷兵部尚書以固安縣公同中書門下三品此誌但言兵部侍郎與史不合崔敦禮傳作中書令夫人為陳諸之妻諸有誌已見前其敘諸及其父洵官並夫人封悉與此同洵為宰相希烈之子故此誌自稱曰相門洵為子婦撰誌亦墓銘中之一例而標題及誌文曰府君曰夫人與常誌無異尤所僅見諸卒於貞元十年年五十七彼誌云慈父在堂至夫人卒時則諸年已七十二而其父猶在益年已九十餘乃執筆為文其為悲感宜非所堪故曰兼余子貳之戚云云左傳文十六年公孫壽曰子身之貳也此用其

語諸誌云終于宣教里之弟此誌云卒于恭安之里第陳氏蓋已易居惟其子之名則兩誌皆未載誌言貼賣求財以充凶事案通鑑宋明帝紀虞愿曰此皆賣兒貼婦錢胡注貼亦賣也通典北齊武平以後聽人貼賣園田據知貼賣二字已先見於古矣

樂安孫素朱壙誌

石高廣各一尺二寸八分二十一行前二行後一行無字每行十字至十四字不等正書

樂安郡孫馬將開府儀同三司試太常卿兼左金吾衛大將軍上柱國樂安郡開國公孫素朱巨父雲麾將軍注督婆高氏子前任鄭州兵馬使孫興國四孫紫華五兄前任魏州馬軍大將陳真身

馬軍輔國大將軍行左金吾衛大將軍負外置□□□
監樂安縣開國公□□一千五百戶孫庭林

李朱妻李氏興國妻馬氏紫華妻武氏懷真妻郭氏庭林段氏李
朱男九陵懷玉□望懷幹興國男惠達惠業心清茶奴黑子美子
石頭百憶庭林男光順文通光義光用孫男万德万□万勝何子

元和四年十一月十八日

此刻先書孫素朱而後兩作李朱既是一人必有一誤樂安
本孫氏郡望在唐即棧州與鄭州俱屬河南道魏州則河北
道轄地也以官而論則太常卿金吾衛大將軍皆正三品殿
中監亦從三品論階則文散開府儀同三司從一品武散輔

國大將軍正二品雲麾將軍從三品論爵則開國郡公食邑二千戶正二品縣公一千五百戶從二品而上柱國居勳官第一開府儀同三司居文階第一尤為極品馬軍馬將不過藩鎮部曲而所帶京秩崇赫若此蓋唐自軍興後度支耗竭則專以官爵賞功歐陽公所謂軍功之官也通考載肅代以後諸將出征皆給空名告身自開府特進列卿大將軍下至中郎將聽臨事注名其後又聽以信牒授人官爵有至異姓王者及清渠之敗復以官爵授散卒由是官爵輕而貨重大將軍告身一通纒易一醉云云蓋有慨乎言之也孫氏得官亦正由此觀於此碑益可證馬說之有據矣員外置下似是

同正員三字蓋員外置之名太宗時已有之其後又有特置同正員者亦因初制官少踵事而增遂姑予人以名也

彭夫人墓誌銘

石縱橫各九寸一分十五行行十六字正書

唐故彭夫人墓誌銘 并序

夫人彭氏其先開封人也今移淮楚遂揚州江陽縣人矣曾祖德沅祖幹父克和稟性仁孝才聞於朝夫人即公之二女也三儀五德遠者流鄉登笄歸隴西李氏無虧婦德受大家閨訓承母師遺教不期天奪其壽魂掩泉鄉以元和五年八月一日終于江陽縣孝儒坊之私第享年五十有三夫人生子一曰士仁夙承雅

訓早著文名哭踊泣血哀蹄無聲即以九月十二日定于清甯鄉
嘉木村故刻貞銘永茲為記銘曰

皇天何苦 殲我彭母 浮雲來往

魂歸何去 卜葬平原 空悲風樹

子則泣血 朝暮蹄呼

張氏所得諸石大率皆甘泉出土者當時所居所葬之地既
同而年歲前後又相去不遠故文句字體均大略相類亦風
氣然也

符載妻李氏墓誌銘

石高一尺一寸八分強廣一尺一寸
五分十七行行十九字有界格正書

亡妻李氏墓誌銘 并敘

孤子符載述并書

夫人姓李氏其流派出於天漢之一枝矣衛尉卿昇之孫吏部尚書嵩之堂姪孫房州刺史暹之女凡婦之柔嘉茂淑組紉應對之事夫人備有焉加以敬恭長上誘納卑鴉情禮周洽六姐睦然風韻孤遠不嬰常態中饋酒食外彈雅琴詠古詩鄙人褊吝陰有輔助不幸友落春秋三十六以貞元十一年三月十二日疾卒于尋陽是年四月廿一日權窆于德化鄉之北嶺元和七年八月十日載上天降禍荐丁疊罰扶護靈輿歸於鳳翔日得啓發祔于皇先姑之側禮也嗚呼生展於敬養歿葬於舊鄉

上不媿于三光下不畏于九泉可謂始終婦道無罪悔矣男日匡
儒女曰上清子 琴瑟不違哀纏荼蓼弘農楊夫人育之於頤復
訓之於教義幾乎成立莫知所自庶足以慰幽魂焉 銘曰

浮江沂漢歸舊鄉

已方甲穴掩玄堂

千秋萬歲安未央

右李氏為吏部尚書嵩之堂姪孫舊唐書嵩有專傳新書附
於淮安王神通傳神通為太祖之孫鄭孝王亮之子故誌云
流派出於天漢之一枝舊書嵩傳與兄昇弟暉尤相篤睦新
書載暉至太僕少卿其子進亦知名不言昇為何官據宗室
世系表光祿御昇吏部尚書嵩太僕卿暉三人平列一格誌

言昇為銜尉卿據其所終之官而言此為表所未及其下一格有遶造遶遇進五人與暹同輩行而無暹名又藝文志有符載集十四卷其下未言載之仕履考晁公武讀書志別集類中符載集十四卷云符載字厚之岐襄人隱居廬山不為章句學貞元中李異為江西觀察使薦其材授奉禮郎為南昌軍副使此誌言李氏卒於尋陽權寔德化乃知為載作南昌軍副使時事非藉晁氏之書則無從得此佳證為之一快誌言靈樞歸於鳳翔與晁氏所言岐襄人亦合唐人多稱祖為皇如李習之皇祖實錄頗為後世所譏此言皇先姑與之相類亦唐人當時風尚如此由宋以後則不敢用此字矣葬

地書向自漢已然隸釋郎中馬江碑言先君之庚地唐人最
喜言葬向某穴文苑英華張說馬府君碑云夫人穴於兆之
甲杜少陵集祖母范陽縣太君盧氏墓誌云入著作之大塋
我太君用甲之穴與此誌所言已方甲穴可以知其取東方
發生之象於甲穴尤吉誌前署名偁孤子符載此為載居憂
時所撰古人居憂與人書每稱孤子如徐陵王績集中猶斑
斑可考此則施之誌石亦金石例中之逸聞也誌中卑鴉即
卑孺友即夭字孺古本作鴉

錫齡案元道山切易
皇以顯自韓魏公始

秦府君夫人王氏墓誌銘

石高廣均一尺二寸七分二十二
行行二十四五六字不等正書

唐河陽軍節度故左馬軍虞候秦府君夫人太原王氏墓誌銘并

序

公諱士寧其先風姓之後黃帝之裳也弟一為嬴姓以地為名改為秦氏即其後也曾祖諱邈 皇江州長史祖諱庭秀 皇左羽林軍將軍知軍事考諱諱 皇河陽軍武牢鎮遏兵馬使同都團練副使兼侍御史贈使持節石州刺史功勳崇祿才行芳華英靈智略軍府遵承位居臺憲之封持贈百成之任公即 使君之子也承大名之後弓劔立身武藝絕倫文詞博瞻弱冠從事志効轅節操孤貞雄勇可觀節度使御史大夫衡公濟補馬軍十將元和四年節度使兼御史大夫烏公補署左馬軍軍虞候守奉規政志

若松筠擬保千嗣之榮常以剋已復禮萬人歎仰誰不相欽豈期
上天不吊噩歿賢哲以元和七年六月六日終于私第享年卅四
嗣子三人伯曰遵奴仲曰小遵季曰定遠女閨子檀子各以幼稚
未明禮度踰叫擗踴隣里為之感傷哀聲切人行路為之後楚
先室太原王氏素懷仁德言行無玷聿循禮則九族欽崇享年無
壽春秋廿四先府君十載矣貞元十七年五月廿日即也權殯于
河陽縣北界安北平原之禮也日居月諸松揚已茂今室王氏四
德明著百行俱全婦禮無虧長幼和睦目遠凶讐踴泣宮中以元
和八年歲在癸巳二月廿五日移發 王氏□棺槨同就汜水縣
東柎平原之禮也陵谷變易人倫遠比□刊貞石銘曰

雄雄大將

後忽言賢

昔為英傑

人皆可先

今日寂寞

沉於永泉

世之有死

痛哉盛年

桂蘭芳茂

霜凋屢遷

嗟隴樹藹藹

恨花葉兮秋萎

薤露悲兮已矣

思再覩兮無期

右按唐河陽軍德宗建中四年置見通鑑虞候唐節度使下有此職胡三省通鑑注云虞候古候奄之職唐書百官志羽林大將軍下無知軍事之名而列八品九品參軍事者凡五人此知軍事疑為試守知攝之知即參軍事中之一人亦未可知姑以俟考河陽之有鎮遏使代宗時馬燧曾為之士寔之父讓為河陽虎牢鎮遏兵馬使同團練副使副使為其兼

職故云同其虎牢置鎮遏使蓋因其險而設如貞元六年設
藍田渭橋等鎮遏等使皆險要也侍御史為帶職寄祿官亦
謂之憲銜誌云位居臺憲之封指此唐由武德元年改太守
為刺史加使持節此石州刺史雖為贈階猶沿其稱士宜由
銜公濟補馬軍十將十將見於通鑑唐紀甚夥特如別將子
將之類惟考唐之官河陽軍節度使在元和四年之前先有
路嗣恭李元沔孟元陽元陽之後有烏重胤無有所謂
銜公者誌云元和四年烏公補署左馬軍虞候按之通鑑元
和五年重胤以都知兵馬使縛盧從史功授河陽節度使盧
從史傳亦載此事於五年此作四年疑未可據此誌如志効

轅下奪去一字左馬軍軍後一軍字複寫行路為之後楚後
楚當作酸楚又如即也二字亦疑有奪誤而如權蹟於河陽
縣北界安兆平原之禮也句初謂之禮也三字不詞梁氏玉
繩誌銘廣例歷引義興周夫人誌銘孫志廉誌銘張安生誌
銘王訓誌銘尼如願誌銘皆有之禮也之語謂唐時自有此
文法非字之脫此誌亦可援之為例然究不可盡信後人若
尤而效之則過矣

劉通墓誌銘

有益

石縱橫各一尺一寸九分十八行行十九字至二十二字不等
正書

劉府君張夫人墓誌銘

益三行正書

唐故彭城劉府君墓誌銘 并序

府君諱通其先彭城郡人也家承漢緒德襲堯風門稱碩儒世躡
高位 父諱滔養真不仕履順而安唯道是從居簡無悔靈鑒豈
惑虔流不私况 府君性自天姿幼沐庭訓式備詩禮之義克修
敬慎之容恩惟睦親謙以和衆豈在遐迹其誰不瞻奚啻天上
賦中壽奄折梁木誕萎哲人以元和八年九月十日終于揚州江
陽縣崇儒坊之私第享年七十矣 夫人清河張氏蟾宮降德健
夢膺祥聲華既芳容範增肅鳳唱斯洽龍光奄分雍魂九昇哀臨
三絕男一人名士舉恭惟世德言念孝思爰自執喪毀過常制泣
奉龜策將謀所安人神叶心靈兆告以其年十月十八日丁酉

躬護 喪觀安厝於江陽縣嘉甯鄉五乍村之原禮也恐陵谷有
變乃刻石紀德銘曰

滂々豐谷 霏々碭雲 威德不亡 遺生府君

智實天假 學如素聞 光景莫留 英靈已分

奄卜五乍 屹為一墳 川水夜流 松煙晝昏

空有書劒 傳於子孫

右誌與其妻張夫人誌合刻故蓋以劉府君張夫人並題然
夫人前卒數年故仍按兩誌年歲分錄誌稱德襲堯風案帝
堯之後受封於劉其後劉累以能擾龍事夏后孔甲事見春
秋左氏傳晉之士氏乃其分支故士會歸晉其處於秦者仍

為劉氏范宣子謂其祖自堯以上為陶唐氏在夏為御龍氏則劉氏系出於堯更可知矣

左千牛衛長史高承金合祔墓誌銘

石高一尺四寸三分廣一尺四寸二十一行行二十一字正書

唐故左千牛衛長史渤海高公合祔墓誌銘并序

鄉貢進士李說復撰并書

維元和八年冬十一月九日戊午左千牛衛長史高氏捐館舍于磁州立義里弟春秋四百四十五甲子卷之居人輟春相吊越三日庚申殯於柩階明月景申塋我公于昭義縣臨水鄉之西原近先君塋順我公之孝心禮也公諱承金字承金渤海人也齊文宣

帝都鄩子孫食邑於臨水遂從家焉周襄齊主夏盟高子實為宗
卿元氏倂擾天命文宣爰革魏正朔王之後宜乎其盛父祥克勤
□□不墜清修養三園之和以高尚為事笑子張之于祿鄙寧戚
之飯牛好爵莫得而糜焉故天鍾美于我公公幼而孫弟長而貞
固以刀筆為吏文而無害攻書劍之術謀而有戈郡以□聞拜朝
散郎左衛兵曹遷左千牛衛長史以□貴為憂告歸中歲嘉止足
之分養老上庠清一以齊其心蔬食以樂其道故降年有永德音
無瑕夫人武功蕪氏賢明澍慎君子好仇窈窕幽關大邦之媛先
公六年而歿至是祔焉有子懷彬蘭州廣武府果毅拊心泣血喪
致其哀追養繼孝葬之以禮懼岸谷將化咨說復為銘詞曰

石鼓堡方銅臺平

漳河曲方淦水清

高標上壠九原上

千秋萬歲識佳城

唐十六衛首左右衛終左右千牛衛左右衛初曰左右翊衛
武德五年改為左右衛府龍朔二年省府字各曹參軍事皆
正八品下左右千牛衛初曰左右備身府武德五年改為左
右府顯慶五年又改曰左右千牛府龍朔二年復改曰左右
奉宸衛後又改今名長史左右各一人從六品上朝散郎則
從七品上階也唐取士之制由學館者曰生徒由州縣者曰
鄉貢其科之目有秀才有明經有俊士有進士而世尤以進
士為重昌黎答崔立之書既自言之而王涯亦謂衆科之目

進士尤為貴其得人亦最為盛則當時風氣可知矣礪州天祐三年更名惠州故地理志以惠州入錄實則改惠州甫一年而唐亡以前稱礪州者二百餘年不當驟去其故號史家例以後未為斷自為所陷耳厥後晉取其地仍稱礪州蓋不予朱溫以改矣攷礪州建於隋開皇十年大業中廢武德元年復置貞觀後併入相州至永泰元年昭義節度使薛嵩表請復置并即故臨水縣地置昭義縣屬焉此誌有臨水鄉即以故縣名之也臨水之建始於魏黃初三年故高齊時得食邑於此滄水正出於西北之神窟山山海經所謂神囷之山滄水出焉者也石鼓亦山名元和郡縣志以為鼓山滄水所

出太平寰宇記鼓山亦名滏山有石鼓形二所冀州圖云鄴
城西有石鼓鼓自鳴即有兵並引隋圖經云滏口山出磁石
案磁州得
名以此本草則以為出石鼓山是神困滏口石鼓實一山
而異名也寰宇記又載滏口泉在昭義縣西一里半漳河在
縣西南四十里是二水相距甚遠銅雀臺在漳河對岸地屬
相州尤與縣境無涉銘詞特約略言之耳至磁州州名惟元
和郡縣志作磁且云永泰元年以河東有慈州故此加石是
其先原作慈加石後則為磁今諸書皆作磁誤矣此誌正作
磁知唐人未嘗作磁且並無磁字其出宋以後人俗省可為
明證而韻會磁下引說文云石名可以引鐵本作磁从石慈

聲今省作磁不知何以謬誤至此不但說文無磁字即礲字亦因礲州創製唐以前無有也若有則既為礲石字即早以礲州名不俟後來加石矣蓋礲石之礲先亦作慈故以慈名州以是遞推有確然無疑者攷漢書藝文志慈石取鐵字正作慈亦一證也案廣韻有礲字然其書屢經後人增修當係後人用唐字俾入且亦有礲無磁又康熙字典磁下亦引說文蓋即據韻會所引未檢原書王氏攷證亦未拈出並識於此貞觀十年改統軍府曰折衝都尉別將曰果毅都尉凡天下置府六百三十四此從唐書兵志及通考每府置折衝都尉百官志作六百三十三一人左右果毅都尉各一人地理志蘭州有府二曰金城曰廣武廣武者即兵志所謂凡府皆有名號者也元和之際府

兵及曠騎之制久壞此誌有廣武府果毅蓋亦僅存其名而已文中用周易好爵二句語書作糜業今本周易及石經岳本閩監毛本皆作靡釋文云本又作糜陸氏作緡京氏作劇亦即糜靡二字之異體諸本無作糜者然糜與靡通禮記少儀國家靡敵孔疏云靡為糜謂財物糜散古字通用據此則糜可作靡靡亦可作糜矣唐人諱昞故丙皆作景此又唐碑通例也

銘於業歷觀唐人碑誌磁州字皆作磁無作磁者足徵此說之確

□□和上塔銘

石前缺一角高一尺廣約一尺四寸五分二十行行十四字正

書

上缺
上塔銘并序

□□□□□□□□
女河東聞喜人 皇□□□
皇朝懷州刺史


伯父□□ 皇朝御史大夫戶禮二尚書 和上□□于上稜受氣

純粹和而能峻性本乎仁故與道并動而之禮故与律合内忘乎
我故與物等以是三德契乎宗原所以鼓舟航越溟濤出死生之
津肇法身之基湛然一室世將五紀復本守樸無□□公跣言色不
形物亦自化非真質恒德之厚其臻是乎若乃門内之理子姓嬖
婦莫不動資稟决而業成焉其内外□施之溥又如此委和順化
不耗天數以元和八年十二月廿六日終于本寺時年八十四應
夏六十二弟子見用等建銘表塔俾後瞻此而化也銘曰 嗚噫
上天賦其德 惟貞恒 遂蹈于佛乘 以至于氣定神凝 爾

後之人三復之 無默於斯 姪潯文

右銘文既簡淨而書法秀整在河南聖教序平原多寶塔之間致為可愛石雖中斷然全體完好未損鋒芒而獨於首二行殘缺致其名氏不能見於後世亦殊可惜夫古人碑志固有太半磨滅而獨存其姓名里貫供金石家搜采者殆亦有幸不幸耶然余讀此文竟見文後署款為其姪潯因戲謂唐有裴潯當時頗以文重此得毋即是耶乃偶閱篇首有河東聞喜人句因復憶及裴氏正聞喜望族所謂潯者必即裴潯乃取潯傳攷之則既敘其為河東聞喜人且稱其以蔭仕元和初其後歷仕憲宗穆宗兩朝以此證碑時代亦正相合然

後知其人之果為裴潯而余此悟之若有神助也然則和上之名雖不傳而猶得攷其姓與族於摧殘斷缺之餘亦云幸矣而緣歷千載竟使裴君文字復得重見於今日不又亟當補入全唐文乎惜其伯父以上之名或缺或泐不能攷見然亦無庸取證矣至題款不曰某人撰而曰某人文則北魏始平公造象孫秋生造象已有此例傳稱潯篤學善隸書宣和書譜謂潯隸書為特推重晚歲行草尤勝今華嚴廟有貞元九年裴潯題名然則此銘亦必潯書也



白齋藏石記卷三十

唐十四

陳志清墓誌銘

石高廣均一尺四寸五分
十九行字數不一行書

□故臨洮軍副將雲麾將軍試殿□□穎川陳府君墓誌銘并序

文林□絳州司倉叅軍步□□撰

昔高祖得丞相陳平運玄機除□楚而成帝王之業也□載載諸
呂再□劉氏其餘勳德□□在史籍略不書之公即漢丞相之後
也

□貫皇開府儀同三司檢校太子賓客公即賓客之
元□□諱志清□□□□靈珎粹器望懋愍仁恕允克弱□□

人倫風軌

恂恂在躬

謙謙諸己

尚雄地貴

堂在戶幽

人婦月帛

風憐雲愁

青松鬱鬱

白日悠悠

尅銘翠珍

以紀千姝

右按唐書兵志唐初兵之戍邊者大曰軍小曰守捉曰城曰鎮而總之者曰道安西道凡軍十八其十曰臨洮軍唐志無副將之稱元肅之後所置武職往往不與志合此副將應如鎮將之副試殿下闕二字當是殿中監為其寄祿之官誌云終於鳳翔府天其下闕數字地理志鳳翔府領九縣首為天興陳應終於此唐書百官志陪戎副尉為從九品下之武散官左金吾大將軍則正三品之武職事官舊書職官志陪卑

擬高曰守志清之子英奇以陪戎副尉守左金吾大將軍其
超資越序亦甚矣此誌出土未久蝕裂已有作滿月形者唐
人墓誌每言玄堂此亦有堂玄戶幽語按唐有韋端玄堂誌
間帖唐高宗書云玄堂已成既得早了蓋唐人陵墓皆得稱
之亦無深義可尋云

安國寺尼劉性忠墓誌

石高一尺寬九寸七分十九行行二十字字徑四分彊正書

唐故東都安國寺比丘尼劉大德墓誌銘

并序

弟徵事郎前行宋州文學陟撰

有唐元和十年五月六日東都安國寺尼大德奄化於伊闕縣馬

廻山居春秋五十有四大德俗姓劉氏法諱性忠唐右相林甫
公五葉孫曾祖齊敬徐州司馬祖正心趙州平棘縣令考從父鄭
州滎陽縣令妣隴西李氏大德即滎陽府君長女也器比冰壺
門承高烈生知厭俗不尚浮華童齡出家稟性端潔纔七歲師事
於姑年廿授戒於佛持經五部玄理精通兼三千徠貫博達內
鑒融朗不捨慈悲外相端莊已捐執縛嗚呼積善無疆不授福於
今世色身有滅當獲果於未來妹性貞弟陟門人辯能恒靜等
痛手足彫缺哀法幢傾摧咸願百身流涕雙樹以其年七月十三
日歸寔於龍門望仙鄉護保村先師姑塔右宗道教也慮歲
紀綿邈陵谷頽夷陟不揆才拙粗書於石憤深感切悲不成文銘

曰

色身示滅法性常存慈悲濟苦雅操殊倫超然厭俗邀矣歸真道
雖離著思豈忘親仰 德如在瞻 容靡因窈窕空山悠悠白雲
涕泗橫集絨哀為文

誌云性忠俗姓劉氏唐右相林甫五葉孫曾祖齊敬祖正心
考從父弟陟按新唐書宰相世系表劉氏廣平房林甫中書
侍郎樂平男出自漢景帝子趙敬肅王彭祖之裔林甫孫齊
賢更名景先相高宗為齊敬弟弟行齊賢孫從一相德宗則
是從父弟弟行矣自林甫至從一恰四世性忠為從父女誌
云五葉與表政合而齊敬正心從父陟之名表竝失載可据

誌補史之闕林甫官祇中書侍郎

侍郎劉林甫請四時社選見通鑑貞觀元年新唐書

選舉志

而誌云右相諛墓之文侈陳官伐紀載不無失實

世

表廣平劉氏宰相三人祥道景先

又誌云積善無疆不授福

從一通鑑亦無林甫為相之文於今世按無疆字詩經婁見皆作無窮竟解此獨釋作善不蒙福誼甚新

檢校太子賓客上護軍咸協妻向氏墓誌銘

有蓋

石高一尺二寸七分廣一尺二寸五分二十二行行二十三字正書蓋三行九字曰大唐故向夫人墓誌銘篆書

唐朝散大夫檢校太子賓客上護軍咸協亡妻淮陽向氏夫人墓

誌銘

并序

朝議郎前太子中允張季平述

夫人淮陽人也父說 皇沈丘縣丞夫人則沈丘之次女也向公

與賓客俱家本於陳賓客幼惠而孤長庶而孝十三休讀書十五
罷學劔□遊長衢寒寒諤諤謙怡怡衆所驚異長老相謂曰此
子毛骨雄秀煙雲邈然則嫫媧再興諸葛又起向公奇之願結姻
好賓客遂諾夫人初笄之年禮娉君子尔來十八年矣以清風為
德以片玉為容事姑之敬有比恭養育子之知過於孟母邕邕穆
穆能和能柔與公如魚水之合體若鸞鳳之並飛將謂百年之齊
榮豈料一朝之非意寢疾俄尔大謝將及以元和十年九月十五
日終于河南縣樂城里之私第享年三十六嗚呼楚王宮裏不見
朝雲秦女樓中空懸夜月以其年十月十二日權厝於龍門天關
之南伊汭鄉中梁之原禮也長子登仕郎試左衛長史上護軍克

貞次子試絳州太平縣尉雲騎尉克貢皆絕業泣血方比古人侍
奉嚴君禮無滅性時屬艱危難歸故里擇地茲野神兮可安鄙夫
淺劣從命紀之陵谷或遺豐銘永固乃為銘曰

夫人一事君子門 禮樂六親取儀則 善惡納在於襟懷 喜

怒不形於顏色 其一 夫有耳何不下聽 天有眼何不下視 花鏡

秀而風飄 福不霑而禍至 其二 故鄉歸路兮永絕 益地閉骨

兮長休 山深夜臺兮窸窣 隴樹悲風兮颼颼 其三

唐淮陽郡即陳州故云向公與賓客俱家於陳沈邱春秋時

沈子國唐屬潁州然其名不見於隋志而唐書地理志沈邱

下注云本鄆州領沈邱宛邱唐初州廢以沈邱來屬則似唐

以前業已置縣者案豫州之境王世充建置州縣甚多皆分注唐志此亦必世充始置唐志偶未別白耳河南縣秦置唐與洛陽俱為河南府治但秦之河南縣即周王城地洛陽縣即成周地一在今府城西北一在東北漢魏以來因之晉書地道記括地志禹貢雖指可證也自隋改建東都移河南洛陽二縣並附郭內唐代因之於是縣名雖同實則皆非舊治矣絳州唐屬河東道太平縣則貞觀七年置也太子賓客貞觀中嘗以宰相兼領至開元中定員四人正三品中允二人正五品下蓋李平與協同為東宮官屬也唐自京縣畿縣外縣分四等故令丞皆無定品視縣為差惟尉則皆從九品第

略分上下耳左右衛各有長史一人從六品上散官則朝散大夫從五品下朝議郎正六品上登仕郎正九品下勳級則十轉為上護軍視正三品二轉為雲騎尉視正七品夫人卒於元和十年誌稱時屬艱危難歸故里乃指蔡州之亂而言蓋蔡州自李希烈吳少誠相繼叛亂歷四十年至是年春吳元濟發兵反凶諶尤熾陳蔡道梗故誌銘云然幼惠即幼慧列子穆王篇秦人逢氏有子少而惠漢書昌邑王傳清狂不惠並與慧同

義武軍節度兼監察御史石默嘏墓誌銘

石縱橫各二尺有奇二十行行二十四五六字不等行書

唐義武軍節度易州高陽軍故馬軍都知兵馬使銀青光祿大夫
兼監察御史樂陵郡石府君墓誌銘并序

府君諱默啜字默啜得封氏於媯皇之胄振芳猷於晉趙之代富
可以擊破珊瑚樹貴可以遠趙稱至尊史籍具列讀何匪虛祖考
雄父並名光玉墀連選著累代之勲繼踵播搏天之勢即銀青光
祿大夫兼監察御史河東縣開國男賞封食邑五百戶是公之
爵祿此者蓋非一度乃積重運應承百戰百勝之勞或是七縱七
擒之略而致耳大丈夫到此孰不□□於雲霄矣久未展効之
所逆侶止自亡魂近日遊獵之山啼猿猶知見□於戲人生運有
終極命無長准享年七十有三奄休壽於元和十一祀季春姑洗

之月十三日在本鎮易縣南坊之別業矣是用就泉隱匿 靈魄
歸牛金骨見瘞玉拳流芳 武侯斯傾狂師仍怯哀兮切兮沈一
寶痛兮悼兮傷二龍即長曰少琳次曰少清及夫人康氏子母聚
酷而辨訴上天泣血橫滿然禮有常格須安永固以其季八月廿
四日寔於州西北燕山之陽陵雲鄉之滕埠卜地得生地之壘築
龍之窟高墳深壘而下貫九泉仍恐後山河混淆勒玄珪而紀實
尔 銘曰 榮霸標青史 功勳振大音 運終樂有極 限
到苦難任 慟哭唯妻子 推殘貫古今 昔時一國寶 此日
九泉沉 高墳千古萬古 松柏前林後林 盤旋兮唯日與月
相望兮荒塚青岑 人生若是 孰不傷心

默噉新舊唐書無傳志文又陋且略其事蹟蓋不可考或謂
雄父恐其祖若考之名然唐書雖有石碣傳年代不合則雄
父者乃贊美之辭非其名也義武軍據方鎮表置於建中三
年地理志定州下又以為建中四年置表志皆出歐公不知
何以自相矛盾考通鑑建中三年二月以張孝忠為易定滄
三州節度使五月置義武軍於定州以易定滄三州隸之通
鑑既皆書於三年自當以方鎮表為是地理志作四年者誤
也孝忠傳但云詔定州置
軍名義武未著何年地理志易州有高陽軍與墓志合
惟志稱石氏得封於媯皇之時蓋指煉石事為言可謂誕矣
還與環同漢書食貨志還廬樹桑師古曰還繞也又禮禮運

還相為本鄭注以為如環無端其義可見即長曰少琳即字當是郎字奪筆宀當即穴然字形近宀說文宀汚衺下也廣韻宀下處也集韻下地也於義均近則或即宀字異文魏司馬元興墓志標題既具列官位文中遂不複述錢氏大昕稱其文字之簡謂後代罕知此法今此志標題及正文於默啜官位籍貫蓋亦有互見之義云

李岸墓誌

石高寬各一尺四寸五分二十行行二十五字至三十一字不等字徑五分行書蓋高一尺八寸一分寬一尺七寸九分二行行二字字徑四寸篆書字間有花紋四周十二地支有像四角乳坤艮巽卦文

李公墓誌

蓋

大唐故李府君夫人徐氏合葬墓誌銘

并叙

府君諱岸字岸隴西李氏美州卓城縣人也曾祖滔開府儀同三司守左金吾衛大將軍試殿中監祖寔任相州錄事參軍父現雲
麾將軍試太常卿自曾祖洎乎 府君歷代有四凡一千二百甲
子皆衣冠經世禮樂承家以詩書仁孝為業傳於子孫矣當 府
君好仇之日屬 夫人穠李之春男笙女簧應指成韻備潔掃之
禮昇 舅姑之堂薦新主饋六十餘載府君以元和二年夏四月
十七日終於博野縣西沙河別業春秋七十有四以有禮亡時遂
摧殯於園嗣子李陽起服授緘於恒州大都督府禮曰 夫歿從
子 夫人其未乎居子思之堂享陳勝之祿每見饗饌即悵而不

食謂其子曰味從何加乎首末之間未曾一日不以忠孝為試雖
王陵在漢孟氏擇隣方之於今亦無以加也元和十年歲次乙未
冬十有二月奄遇疾終於郭下縣崇道坊私弟享年八十有二丙
申冬十一月廿九日卜葬於府城北一十五里壽陽之原禮也迎
府君之柩輜車發潯水之陽啓夫人之邑旌旆引常山之路
一柳既掩雙棺永存合葬非古周公所從也嗣子季陽授成德軍
節度作坊判官泣血疋帛觸途盡禮可謂後未之曾閔也恐丘夷
泉實故集事書年予陽之外兄藝在文什愴有宮門之石方垂不
朽之名銘曰

夫為斧而薪之柯

婦為釜而味之和

同壽考而歡慶多

際乎際乎駒影過

樹欲靜而風奈何

泉中鏡而無再磨

蕪上路而徒悲歌

日居月諸墳隴盡

千峯万岫空蒼藜

右墓誌李君曾祖滔祖寰按新唐書宰相世系表趙郡李氏東祖房有滔與寰二名相距不遠唯不著其官或即李君之先德歟誌云李君終於博野縣西沙河別業夫人從子於恒州終於郭下縣崇道坊私弟博野縣唐屬河北道深州今屬直隸保定府謹按大清一統志沙河在祁州西南自定州流入合於唐河即古派水也博野縣西南至祁州治三十里今在祁州西南之沙河即唐時博野縣西之沙河也郭下縣攷兩唐書及元和郡縣志竝無此縣名殆猶坊郭縣云爾

即真定縣也曰終於私弟意者當時官府媿屬不同居公麻
歟弟不作第作第殊典雅銘詞藎上路而徒悲歌露作路与
雲作云霜作相例同

李仍叔女德孫墓誌

石高一尺五分寬一尺五分行十五字字徑五六
分正書

唐渤海王五代孫陳許瀨蔡觀察判官監察御史裏行李仍姪
四歲女德孫墓誌銘并序

女生元和乙未歲七月廿日亡代代歲七月十八日於同州內城
官舍來廿七日己酉瘞京北府萬年縣龍首鄉因聖寺佛閣西門
之南地土連亡姪之墓風接 西瑩之松莫尔孩魂不怕幽壤

銘云

姓李氏生崔氏聰明神光骨髮天祉言語未正自解親親顧瞻溢
彩顏色沈人走弄之間嘔吐生疾氣壅深喉血流中質玄風潛吹
元精不親柔閑在抱呼哭莫應既未及殤詎可等彭肝腸燭起無
奈此情

元和十三年戊戌七月癸未朔廿七日己酉仍州
撰文

按唐渤海王奉慈新唐書有傳舊唐書增龐西王博又傳高
祖兄湛之子博又之弟武德初封渤海王顯慶中累遷原州
都督堯謚曰敬新書載奉慈七世孫戡字定臣常惡元和有
元白詩多纖豔不逞而世競重之乃集詩人之類夫古者斷
為唐詩以譏正其失云以世次攷之戡於仍叔為孫輩仍叔

譔此墓誌丁元和十三年戡生於元和己後故有譏正元白
之作時代政合仍叔官陳許潁蔡觀察判官新書地理志建
中二年以郾城臨潁陳州之潁水置潁州貞元二年州廢元
和十二年復以郾城上蔡西平遂平置潁州長慶元年州廢
此墓誌作於元和十三年政潁州復置之次年也

蕭子昂墓誌銘

石高一尺二寸一分微強廣一尺二寸五分
分二十二行行二十六七八字不等正書

大唐故蕭府君墓誌銘

蓋篆書

唐故相州彭城郡蕭錄公合祔墓誌銘

并序

汝南郡周保撰

公諱子昂字貫相州安陽縣感化鄉曲溝管之人也祖諱敏考諱興皆有其德而無其位 公家代儒門氣色殊異發言與公侯之腹心規矩得鄉閭之取則或州縣不均曲理偏訟雖各有司 公且能直諫牧宰納談於四方賓隣已聞稱之為智者於是專城政德令長自人考舍得其中中讚揚舉為上上 朝廷節使畿內頗知府幕轄門熟人不歎公信行志高曾無宿諾為卑為長有讓有慈尋古覽今在醜不覺嗚唏天降之禍寢疾弥流不幸以元和十二年三月廿二日終高平曠之私第享年七十有八 賢高氏夫人去貞九四年傾歿每聞承順舅姑謙和娣姒訓子不踰禮節事夫相敬如賓非紅妻孟母之賢誰能備於此 公再督清河

郡張氏夫人孀居主誓不失儀度訓撫孤子無黨無偏內言不出於閫外言不聞於耳居仁執禮克儉成家孝行畢施貞賢備著今用元和十四年三月廿五日啓茲舊堯州西卅五里即公之先代塋內西北也松栢氤氳溫風時起南近大道北有流渠東西坦然平源禮也嗣子五人長曰自勉次曰自察三曰自寬四曰自通幼曰自峯自勉等難兄難弟含孝含忠毀拔過情傷乎天性保與自勉昆季相識曰近託述斯上慮陵谷將變年代推遷刊石記銘以傳不朽

公之盛德銘云曰

美哉蕭公 德重深遠 人皆仰之 好賢不倦 討習文墨

先禮後傳

拯孤濟貧

敬愛親眷

孝慈於家

六姻悲戀

月落濁水

珠沉九泉

屏帷窳悵

空有嬋娟

嗣子泣血

墳左喧喧

內外表裏

祭饌心專

素飭懸懸

柩車搖搖

形瘞重壤

魂飛碧霄

右誌前署相州彭城郡蕭錄公按相州唐為鄴郡彭城郡乃蕭之郡望誌於相州下著彭城郡又非有五等之爵及婦人稱郡望可比殊易混雜據誌子昂為修飭自好之士於睦姻任卹排難解紛力行不倦名聲流溢牧守鄰邑納其規誨馬少游所謂鄉里善人子昂頗得其實其云考合得其中中讚揚舉為上上兩語按唐書百官志考功郎中員外郎掌文武

百官功過善惡之考法有四善二十七最名目

具錄不一最

四善為上上無最而有一善為中中誌文大意牧守得考中
中上上者皆與子昂相善重其為人其言紅妻孟母之賢紅
當作鴻謂梁鴻之妻啓茲舊莪之莪當作莪周禮地官冢人
卜葬兆甫莪注杜子春讀莪如莪按子春讀莪如莪者謂讀
作莪音非謂其字可從莪也此誌題書合祔其上未載夫人
某氏及夫人某氏等字亦為一例唐有澤王府主簿梁府君
榮陽鄭府君夫人傅並夫人唐氏墓誌銘又有
陵崔氏合祔墓誌誌中如坦作怛原作源皆誤字子昂之
題作錄公不知所謂撰文者之周俛俛字罕見疑為儼字別
體儼與捐通又訓為慧姑存以俟別考云

趙夫人墓誌銘

石高一尺零八分廣一尺零三分二十二行行二十二字正書

唐故趙氏夫人墓誌銘

并序

吳郡顧方肅撰

夫人姓趙望在平原祖歿年遠子孫絕嗣無人紀于後世之事今難序焉夫人父諱董皇朝定難功臣官憲試鴻臚大卿先夫人三十年已前而卒夫人即先鴻臚卿之令女也笄年十五執事其第而適于楊氏之門如鳳之飛雙鳴相應周旋二十餘載而楊君寢疾去元和六年十一月終於京地府長安縣閭閻之肆殯金光門外小巖村之里墳塹塹存焉兒女九人皆尚幼稚孤孀撫育霜露所哀迨攀永懷哭對寒爐夫人尋患背脚行李不遽雖坐梁家事猶

慈和六親春秋屢徂容曠衰文且貧無以為節禮徇時宜錄案多
猜迫以從事方再行于吳郡顧氏任迷四五年而公潔躬文字未
遑寓居中彭漢武初興之地矣夫人元和十四年七月十一日不
起宿疾終於茲川以元和十五年

少帝即位二月五日改號為永新元年以其年歲在戊戌二月十
二日歸窆于長安縣昆明鄉魏村先妣段夫人瑩瑩禮也嗣子四
人文晟文幹文嵩文昱等皆以哀號泣血匍匐仰天黜嗣弟兄永
失慈訓方肅以哀情所屬慮在幽冥刊石為文記之於壙其銘曰

惜哉仁賢

逝佳中年

揜瘞藜棘

親賓共憐

愚夫撰銘

買石彫鐫

建記陵谷

他時獲全

林插暮鴉

壘熊啼鶴

寂幕春野

長宵月懸

□□ 刀匕

五蘊虛假

万古悠然

千秋永夜

右誌前後行間尚存字迹當是磨去舊刻重鐫者誌稱夫人父瑋皇朝定難功臣攷德宗破朱泚後凡諸軍使諸道赴奉天及進收京城將士等並賜名奉天定難功臣瑋當即有功於是役者又云瑋金光門外小嚴村之里紫宋敏求長安志載唐京城西面三門中曰金光門并注云西出趣昆明池是金光門即長安西門也宋志并稱唐長安縣五十九鄉而所載僅六鄉及渭陰一鄉謂餘皆無攷近畢沅校補亦僅孝悌永平二鄉蓋所軼者多矣觀此誌知長安縣又有昆明鄉可

以據補餘如小嚴村魏村之名亦宋志所未載者大抵近出唐人墓誌其鄉里村名可補入志乘者甚多又不獨此誌為然也又誌稱寓居中彭漢武初興之地攷漢武初封膠東王其時甫數歲既未之國且此係指長安近地何緣遠及膠東殆不可曉或其所居當日相傳為漢武始生之地如史稱成帝生於甲觀畫堂之類耳又誌稱元和十五年少帝即位二月五日改號為永新元年攷通鑑及新唐書是年吐突承璀嘗謀立澧王惲為太子然未嘗即位改元且其受誅及穆宗即位皆係正月及閏月之事今云二月五日改號則所謂少帝者自指穆宗而言但穆宗初改號永新新舊唐書並無其

事且是年九月李珣上疏尚稱元朔未改十二月韓愈上言亦欲因改元大慶赦賊罪戾皆當年未曾改元之實證然此誌所稱必非虛謬計當時永新二字必與所改長慶一同擬進都下傳播竟誤以為永新顧氏近寓京畿首聞消息不諳體制遂妄見諸文辭如朝野雜記所載宋時訛傳金主改元新德之類耳又是年歲在庚子此云歲在戊戌亦係大誤若非先書元和年號真令後人無從攷矣然李氏紀元編所錄擬議未用年號並未之及今僅見於此誌實足以存軼事而廣異聞亦攷史者所當知云

錫齡素初學記九十要引漢武故事帝以乙酉年七月七日生於栢蘭殿但玩此誌下有終於益川及見明卿先登語則所謂漢武初興之地殆即昆明池矣小巖村見河內郡張氏誌

何叔平夫人劉氏墓誌銘

石高廣各一尺二寸惟標題書款及前四行下段存數十字餘均漫滅行數字數皆不可辨正書

唐平盧節度□□徽□□試右武衛兵曹參軍何叔平故夫人彭城劉氏墓誌銘□□

□□節度隨軍前明經染疇撰并書

□□陰陽之□□男女流形伉儷之義重故牝馬之曰下泐

□□之詠約泐五六字八四德之儀禮備三從之旨詢之於代□

□□以上約泐十二三字昔漢高祖封合肥□齊國史載焉其□以

上約泐十一二字曾□丕大父祥□□戈曼□□隱□□此行

後悉漫滅惟此後第一行有里之二字二行有肅清二字四行有二字五行似有和英字及月字六行似有悼中閨之四字

此誌剝落太甚幸標題尚存可得其主名攷平盧軍置於開元五年至七年升為節度使治營州及上元二年侯希逸南據青州於是平盧節度使之名移屬青鄆然旋為李正己等三世叛據至元和末乃克平之此誌出自山左計刻石當在元和以後矣節度下二字不可辨再下似徵字攷唐文階正八品下曰徵事郎必此三字也節度使有隨軍四人見於百官志而節度上二字亦泐仍當是平盧二字耳誌云漢高祖封合肥□齊肥下似是肱字合肥縣雖漢置然高祖時無封合肥者肱齊似是人名漢書亦無可攷素高祖子名肥封齊王誌溯劉氏所出似正指此事句當云高祖封子肥王齊合

與肱蓋皆誤字耳

石忠政墓誌銘

石高一尺二寸八分廣一尺四寸
十三行行十五六字不等正書

唐故石府君墓誌銘

并序

府君曰忠政字不邪生于京兆府萬年縣人也邑崇仁里清閑不仕自居其家由何氏不幸元和二年四月逝葬城西小□村

府君壽年八十有二終于長□二年七月十日以其年八月二十
一□葬于小文寸長子義後亡而葬於七支□□元年當家□
□□□天鄉南地□□掃灑莊一所遂再□□之厝莊東南□十
步已來遂擇吉辰以其年八月九□□附 翁婆及兄義並安于

墳闕乃命□□存之不朽銘曰

八月 風悲切々 安厝 先靈歸墳闕

孝感理於天 萬代子孫昌不歇

右按宋敏求長安志丹鳳門街南有崇仁坊石君居崇仁里
即此坊其終於長□二年當為穆宗之長慶誌云葬城西小
□村小下當泐嚴字趙夫人墓誌殯金光門外小嚴村金光
門長安西門也與城西語正合下文兩并子下皆當是
小嚴村泐存數筆可證

顏永墓誌銘

石高一尺零七分廣一尺一寸十七行行十七字正書

唐故顏府君墓誌銘 并序

鄉貢明經李德芳述

府君諱永其先瑯琊人也 祖考並繼世承訓餘風所播家傳素業門□清風六合太和隱而不仕 府君中和立身文武全節溫柔成性積祿崇高孝悌邕言謙有則嗚呼不幸遘疾即以長慶四年歲次甲辰二月辛巳朔七日丁亥終於揚州江陽縣布政里之私第春秋六十有八 夫人□南黃氏令則高門容華備質并年之歲□于顏氏之門事君子盡忠於親戚慈以□有男二人長曰亘次曰少洪皆務□□早達義方即以其月廿九日己酉安厝于蕪城之東嘉甯鄉五乍村之原謝氏之地禮也恐年代綿遠陵谷□移故刻貞石紀德乃為銘曰

江漢炳靈 繼生賢明 猗歟顏君 鬱然時英
落日空奄 逝水哉傾 卜葬平野 風樞栢聲

誌稱府君其先琅邪人案顏魯公書多寶塔碑即自署琅邪
蓋本顏氏郡望也廣韻顏姓出琅邪本自魯伯禽支庶有食
采顏邑者因而著族又邾武公名夷字曰顏故公羊傳稱顏
公後遂為氏王應麟姓氏急就篇注亦兩存其說與廣韻正
同惟顏師古注急就篇以為出顛項之孫祝融祝融孫安為
曹姓其裔邾武公名夷父字曰顏公羊傳謂之顏公其後遂
為顏氏云云僅與廣韻後說同蓋出於國稱陳留風俗傳及
萬洪要字其後鄭樵氏族略亦專主此說皆不以出自伯禽

為然王儉譜以為出自伯禽魯公亦嘗駁之其所撰家廟碑
正恪宗師古之說而武氏投堂金石跋反誤引姓氏急就篇
注作師古急就篇注謂魯公臨文不檢為不承其家學自己
謬誤反誠前賢何其慎乎且師古即如王氏亦兼舉兩說然
自是著書之體若自述先世則必專主一宗不得復作兩歧
語義固宜然亦不得謂之不承家學也又誌云安厝於蕪城
之東太平寰宇記蕪城古為邗溝城漢已復荒毀宋文士鮑
明遠為賦即此

諸葛澄墓誌銘

石高一尺七分廣一尺九分
十九行字數不等行楷書

左武衛執戟守中武將軍試左金吾衛郎將諸葛府君墓誌銘

宣德郎試左武衛兵曹參軍韓憲撰

上澄其先瑯琊人也承蜀相武侯亮胄洎

曾祖

孝士牟初受太子文學次遷崇玄弘文館大學士累授

上府

人君器宇冲邁調韻不羣才智天生識量神假

上有室以武舉擢

第拜左武衛執戟實鼎鉉之清階也

上左金吾衛郎將出入

禁衛警蹕嚴廊錦令清展觀

上展展鳴呼瑚璉之器必其用於朝

宗棟梁之材將成功於

上豈圖突生二豎夢起兩極秦緩退醫鵠

侯息壤享

上有八以年 月 日終於河陰縣三山鄉三山里之

松第矣

上人榮陽鄭氏名適班謝禮趙孟姜柔順天資坤德彰著

子年七十有七以元和十五年四月廿一日終於河陽縣之第矣
有子二人女二人嗣子立則見任充府左廂馬步都虞候次子立
成見任河陽軍後院十將幼承雅訓夙荷 仁慈雖日月逾邁每
哀慟過禮故以寶歷元年歲守辛巳九月辛未十五日乙酉塋葬
于河陽城南六里大和里之北原禮也將恐人代遷易谷變山移
刻石命文誌于幽隧詞曰

元氣氤氳

肇降人倫

英苑獨秀

貞幹不羣

事親竭孝

奉國忠勤

佐茲武衛

班秩縉紳

豈圖災變

殲我良人

輻車僣駕

將奄松門

刻石絕惠

万古攸存

望蕭颯兮白楊

庶□□□此君

右按唐書百官志左右武衛屬有左右執戟各五人正四品

上為忠武將軍

新舊書並同誌署衛作
中武缺然中志古通

志又言金吾衛凡翊

軍之翊衛及外府伏飛皆屬焉金吾衛郎將即左右翊府之

中郎將也澄之考士年以太子文學遷崇元宏文館大學士

按百官志及會要崇元宏文兩館各有大學士澄之父不應

兼官兩館然考大澄禪師碑銘為王縉撰縉之署衛亦有崇

元宏文館大學士之稱是則其名已久選舉志武后長安二

年始置武舉中第送兵部其選用之法不足道澄以武舉權

第拜左武衛執戟亦未為不足道者百官志左右衛凡五府

三衛番上者受其名簿而配以職皇帝御正殿則守諸門及
內廂宿衛仗將軍一人押仗將軍缺以中郎將代誌云出入
禁衛以下數語謂此左廂馬步都虞候及後院十將左廂馬
步後院皆散號都虞候十將其正名也銘中刻石絕德當為
刻石紀德特書刻有誌耳